

Visoka škola eMPIRICA proslavila dvije godine uspješnog rada

Kvalitetni, profesionalni i odgovorni

„Uspješni ćemo biti, ako se budemo mogli ponositi sa svojim diplomcima kako se sada ponosimo svojim studentima“



Visoka škola eMPIRICA se od osnivanja vodi jasnim ciljem

Povod okupljanju brojnih zvanica u prostorijama Visoke škole računarstva i poslovnih komunikacija eMPIRICA u Brčko distriktu BiH 17. januara 2014. godine bila je svečanost povodom obilježavanja druge godišnjice uspješnog rada ove visokoškolske ustanove.

U svečanoj i prijatnoj atmosferi uzvanicima se najprije obratio direktor Visoke škole eMPIRICA mr. sci. Muhdin Mujačić. U svom pozdravnom govoru istakao je: „Visoka škola eMPIRICA se od osnivanja vodi jasnim ciljem - izgraditi visokoškolsku ustanovu koja će biti prepoznatljiva po kvaliteti, drugačija po načinu izvođenja nastave, moderna po nastavnim planovima i programima, jednom riječju mora biti prepoznatljiv BREND kada je u pitanju visoko obrazo-

Uzvanicima se najprije obratio direktor Visoke škole eMPIRICA mr. sci. Muhdin Mujačić



vanje u oblasti ICT“, te je dodao sljedeće: „Na žalost morali smo ponekad dio svoje energije, umjesto u promoviranje vrijednosti i kvaliteta koje smo donijeli u Brčko, usmjeriti u pravcu dokazivanja da smo ovdje došli sa dobrim namjerama i da želimo svoj posao raditi kvalitetno, profesionalno i odgovorno.“

Kvalitetan studij

Na svečanosti su bili prisutni i predstavnici Visoke škole za poslovne nauke iz Ljubljane, koja je suosnivač Visoke škole eMPIRICA, i to direktor gosp. Darko Bele i dekanesa dr. sci. Julija Lapuh Bele, koja je također pozdravila prisutne. Svoje obraćanje završila je riječima: „Neka uspjeh naših diplomaca bude i mjerilo našeg uspjeha! Uspješni ćemo biti, ako se budemo mogli ponositi sa svojim diplomcima kako se sada ponosimo svojim studentima.“

Zvanicama je potom prezentiran put Visoke škole eMPIRICA od osnivanja do danas, pri čemu je posebno istaknuto kako Visoka škola eMPIRICA osigurava svojim studentima kvalitetan studij uz učešće domaćih ali i evropskih akademskih kapaciteta, čime se otvara još jedna dimenzija društvenog i privrednog razvoja ove regije, kao i perspektiva zainteresiranoj studentskoj



Obraćanje dekanese Visoke škole poslovnih nauka iz Ljubljane

populaciji, ne samo u ovoj regiji, već i znatno šire. Kao još jedna potvrda kvalitete i profesionalnog rada, prezentirani su rezultati upravnog nadzora sprovedenog od strane Odjeljenja za obrazovanje u Vladi Brčko distrikta BiH u julu 2013. godine, nakon kojeg je 12.09.2013. godine izdato Obavještenje o obavljenom upravnom nadzoru kojim je utvrđeno da je Visoka škola računarstva i poslovnih komunikacija eMPIRICA u akademskoj 2012/2013. godini ispunjavala zakonom propisane uslove za rad i obavljanje djelatnosti. Izniman umjetnički doživljaj prisutnima su priredili profesorica solo pjevanja Aleksandra Lidzek i magistar gitare Elvis Sivčević svojim izvedbama kompozicija Gaudeamus Igitur, Serenada (Milan Prebanda) i Habanera (Georg Bizet). Nakon programskog dijela, zvanice su nastavile druženje uz prigodan koktel, zaželeći pritom Visokoj školi eMPIRICA da se nastavi razvijati kao respektabilna i kvalitetna visokoškolska ustanova koja nudi kvalitetna informatička i poslovna znanja.



Umjetnički performans